

箴

中

錄

卷之四

中

四

國中鑠

南陵
徐氏
謹食
叢書
弟九

篋中集

元結作篋中集或問曰公所集之詩何以訂之對曰風雅不興幾及千歲溺於時者世無人哉嗚呼有名位不顯年壽不將獨無知音不見稱顯死而已矣誰云無之近世作者更相沿襲拘限聲病喜尚形似且以流易為詞不知喪於雅正然哉彼則指咏時物會諧絲竹與歌兒舞女生污惑之聲於私室可矣若今方直之士大雅君子聽而誦之則未見其可矣吳興沈千運獨挺於流俗之中強攘於

已溺之後窮老不惑五十餘年凡所為文皆
與時異故朋友後生稍見師效能侶類者有
五六人嗚呼自沈公及二三子皆以正直而
無祿位皆以忠信而久貧賤皆以仁讓而至
喪亡異於是者顯榮當世誰為辨士吾欲問
之天下兵興于今六歲人皆務武斯為誰嗣
已長逝者遺文散失方阻絕者不見盡作篋
中所有總編次之命曰篋中集且欲傳之親
故冀其不忘於今凡七人詩二十四首時乾
元之三年也

沈千運四首

感懷弟妹

今日春風暖東風杏花折筋力又不如却羨澗
中石神仙杳難準中壽稀滿百近世多夭傷喜
見鬢髮白杖藜竹樹間宛宛行舊跡豈知林園
主却是林園客兄弟可為伴空為亡者惜冥冥
無再期哀哀望松柏骨肉能幾人年大自疎隔
性情誰免此與我不相易惟念得爾輩時看慰
朝夕平生茲已矣此外盡非適

贈史修文

故人阻千里會面非別期握手於此地當歡反
成悲念離宛猶昨俄已經數期疇昔皆少年別
來鬢如絲不道舊姓名相逢知是誰曩游盡騫
翥與君仍布衣豈曰無其才命理應有時別路
漸欲少不覺生涕洟

濮中言懷

聖朝優賢良草澤無遺匿人生各有志在余胡
不激一生但區區五十無寸祿衰退當棄捐貧
賤招毀讟栖栖去人世屯躋日窮迫不如守田
園歲宴望豐熟壯年失宜盡老大無筋力始覺

前計非將貽後生福童兒斯學稼少女未能織
顧此忘知己終日求衣食

山中作

栖隱非別事所願離風塵不辭城邑遊禮樂拘
束人邇來歸山林庶事皆吾身何者為形骸誰
是智與仁寂寞了閑事而後知天真咳唾矜崇
華迂俯相屈伸如何巢與由天子不得臣

王季友二首

別李季友

栖鳥不戀枝喈喈在同聲行子遲出戶依依主

人情昔時雙臺鏡醜婦羞爾形閉匣二千年皎
潔常獨明今日照離別前途白髮生

寄韋子春

出山秋雲曙山木已再春食我山中藥不憶山
中人山中誰余密白髮惟相親雀鼠晝夜無知
我厨廩貧依依北舍松不厭吾南隣有情盡棄
捐土石為同身

于逖二首

野外行

老病無樂事歲秋悲更長窮郊日蕭索生意已

蒼黃小弟髮亦白兩男俱不强有才且未達况
我非賢良幸以朽鈍姿野外老風霜寒鴉噪晚
景喬木思故鄉魏人宅蓬池結網伫鱸魴水清
魚不來歲暮空彷徨

憶兄弟

衰門少兄弟兄弟惟兩人饑寒各流浪感念傷
我神夏期秋未來安知無他因不怨別天長但
願見爾身茫茫天地間萬類各有親安知汝與
我乖隔同胡秦何時對形影憤懣當共陳

孟雲卿五首

古樂府挽歌

草草門巷喧塗車儼成位冥冥何得盡戴我生
人意北邙路非遙此別終天地臨穴頻撫棺至
哀反無淚爾形未衰老爾息猶童稚骨肉安可
離皇天若容易房帷即靈帳庭宇為哀次薤露
歌若斯人生盡如寄

今別離

結髮生別離相思復相保如何日已遠五變中
庭草渺渺天海途悠悠吳江島但恐不出門出
門無遠道遠道行既難家貧衣裳單嚴風吹積

雪晨起鼻何酸人生為有志豈不懷所安分明
天上日生死誓同觀

悲哉行

孤兒去慈親遠客喪主人莫吟辛苦曲此曲誰
忍聞可聞不可見去去無形迹行人念前程不
待參辰沒朝亦常苦飢暮亦常苦飢飄飄萬餘
里貧賤多是非少年莫遠遊遠遊多不歸

古別離

朝日上高臺離人愁秋草如見萬里人不見萬
里道含酸欲誰訴轉轉傷懷抱君行本迢遠苦

樂良誰保宿昔夢同衾憂心夢顛倒結髮年已
遲征行去何早寒暄有時謝憔悴亦難好人皆
美年壽死者何曾老少壯無見期水深風浩浩
傷懷贈故人

稍稍晨鳥翔淅淅草上霜人生早艱苦壽命恐
不長二十學已成三十名不彰豈無同門友貴
賤易中腸驅馬行萬里悠悠過帝鄉幸因絃歌
末得上君子堂衆樂互喧奏獨子備笙簧坐中
無知音安得神揚揚願因高風起上感白日光

張彪
四首

雜詩

富貴多勝事貧賤無良圖上德兼濟心中才不
如愚商者多巧智農者爭膏腴儒生未遇時衣
食不自如久與故交別他榮我窮居到門懶入
門何況千里餘君子有褊性矧乃尋常徒行行
任天地無為強親疎

神仙

神仙可學無百歲名大約天地何茫茫人間半
哀樂浮生亮多惑善事翻為惡爭先等馳驅中
路苦瘦弱長老思養壽後生笑寂寞五穀非長

年四氣乃靈藥列子何必待吾心滿寥廓

北遊還酬孟雲卿

忽忽望前事志願能相乖衣馬久羸弊誰信文
與才善道居貧賤潔服蒙塵埃行行無定心墮
坎難歸來慈母憂疾疹至家念栖栖與君宿姻
親深見中外懷俟余惜時節悵望臨高臺

古別離

別離無遠近事歡情亦悲不聞車輪聲後會將
何時去日忘寄書來日乖前期縱知明當返一
息千萬思

趙微明三首

回軍跋者

既老又不全始得離邊城一枝假枯木步步向南行去時日一百來時一月程常恐道路旁掩棄孤兔塋所願死鄉里到日不願生聞此哀怨詞念念不忍聽惜無異人術倏忽具爾形

挽歌詩

寒日蒿上明淒淒郭東路素車誰家子丹旄引將去原下荆棘叢叢邊有新墓人閒痛傷別此是常別處曠野多蕭條青松白楊樹